

江蘇省立蘇州圖書館
吳中文獻小叢書之廿四

澤
畔
吟





A541 212 0002 55198

刊行吳中文獻小叢書旨趣

地方文獻，全文化之所由積也。文化爲物，羣倫攸共，故凡尊惜文化，應自地方文獻始。吾吳夙稱東南文藝，文獻箸錄，與禩俱進；或既鉛槧，或祕篋衍。經茲兵燹，散佚難稽；歷劫幸存，彌足珍貴。本館整拾叢殘，職責莫貸；爰擬就有關地方文獻之亟待表章者，如先儒專著，寓賢瑣紀，或其遺稿未經刊布，或雖刊刻而流傳已尠，特輯爲吳中文獻小叢書，次第梓行。孔氏有言：「文獻不足故也，足則吾能徵之矣！」謹以竣諸來者之徵體制，苟簡，尙鑒微志。

原序

昔屈原既放流。睠顧楚國。繫心懷王不忘。及懷王兵挫地削。身客死于秦。楚之社稷。幾于亡矣。而頃襄王又聽讒言。而怒遷原于江之南。于是披髮行吟澤畔。至于憔悴枯槁。而卒抱石以自沉。噫。原之死。其幽憂窮蹙。慘怛無憻之意。豈爲一身之不容哉。蓋其所以哀痛迫切于君死國亡之際者至矣。太史公不深究。猥與賈誼同傳。是但以其擯斥流落之迹相似。且以吊屈鵬鳥二賦。其音同耳。故雖稱原之志潔行廉。而其忠君愛國之誠。似未之著也。自是而後。人遂與宋玉。唐勒。景差。均奉爲辭賦之祖。而原之心。其不白乎。後世久矣。朱子作楚辭集註。然後原之心。皦然與日月爭光。然固謂其不知學于北方。以求周公。仲尼之道。而徒馳騁于變風變雅之末流。故其辭流宕怪神。而不可以爲訓。其足增三綱五典之重。而非楊雄以下所可及者。誠有在矣。故又特有取于恥事二姓之陶公。以附于其後。謂辭雖不類。而意之可悲實同。然則後有作者。不惟其辭。而惟其意。豈不亦彰彰乎哉。吳江故侍御閣昭周公。起家進士。兩任邑宰。治行顯聞。及爲御史。巡方江右。却強藩之移師。消逆徒之反側。尤著有方略。已而海水塵揚。蟲沙類化。公乃蔽影深村。蓬蒿塞逕。惟日與田父溪翁。往還雜處。鳥啼花落。驚心濺淚。一寓之于詩。名爲澤畔吟。初病瘋。後又病目。一夕夢至一宮殿。見崇禎帝后。沈瀾而覺。自是遂失明。未幾卒。卒時。手所著詩文集若干。授其嗣子某某。受而藏之。于今六十年矣。今年秋。予偶過公里。公之孫某某。出所爲澤畔吟以見示。予伏而讀之。辭

旨和平。音節古淡。而淒涼悲感之意。時自露于音沉響振之餘。因作而嘆曰。此義熙遺音也。後有知人能論世者。其必以公與靖節翁。同爲三閭之瓣香無疑矣。且夫詩發于志。其語言固不必相襲也。故風雅之後。變而爲騷。騷之後。變而爲漢魏古風。古風又變而爲今體。各因時代之所尙。而不必其一致。惟其不悖于溫柔敦厚之教。而使人讀之。而足以興起者。爲可貴耳。如徒以辭而已。則如蘇子瞻和陶詩。雖氣韻神似。而臭味終不可以苟同。若楊雄之反騷。是又直爲屈原之罪人耳。必知此而後。可以讀公之詩。因序而歸之。使謹藏于家。蓋潛德之發聞。必自有時也。歲在昭陽赤奮若。畢聚月辛卯日南至。吳興後學嚴鴻逵再拜書。

澤畔吟

吳江周 燦闇昭氏著

培菊

隱逸原同性。維持慰寂寥。選嚴辭雜種。庭列盡奇苗。去蠹常行殺。儲花每去條。他時尊酒樂。辛苦亦朝朝。

述懷

聖代流汪澤。先人號碩儒。衣冠聯世族。詩禮訓庭趨。雪案研窮苦。金門寵遇殊。夜郎初仗節。於越繼分符。執法羞冠豸。褰帷恥問狐。幸逢寬大世。不伏曠鰥誅。宛馬肥南草。厓山震北袍。袁公室自陋。鄭子谷偏紆。愛菊開荒徑。尋山託畫圖。行吟常散髮。聽鳥漫提壺。悲喜花開落。行藏月有無。漁樵隨地狎。牛馬任人呼。短髮常疎櫛。蓬門盡網蛛。忘機訓鳥雀。斂迹守蓬樞。與世無求矣。謀身不拙乎。百年徒過隙。四海悵懸弧。佳氣猶埋漢。災侵疊降吳。劍光沉古匣。驥足阻長途。詩酒盟初定。簪纓債尙逋。壯心淪落盡。回首自踟蹰。

甲午之三月。先帝賓天之十年也。詩以哭之。

先帝英靈邁古今。遙知松柏已森森。十年不設櫻桃薦。三月空留麥飯心。尊漢四時猶有臘。思堯百姓尙無音。真人佳氣今何在。五色雲看楚澤深。

又

先帝天顏違十載。侍臣無復賜櫻桃。北陵風雨松楸暗。南國清明杜宇號。漢系尙尊蜀地遠。龍祥況矚楚雲高。千秋血食應無替。豈許荒碑伏野蒿。

登靈巖謁魚山老師卽熊開元

師在空門立得牢。已知苦海會留篙。廬峯背雪禪心遠。竹杖行龍慧力高。石上坐消千嶂月。松間寂送五湖濤。相逢頓覺皮毛換。幾片山雲擁布袍。

花朝社集分得村字

東郊春信入芳村。南國名流盡到門。一夜池塘變園柳。諸賢雲錦奪天孫。彩毫花影看先發。碧漢奎光定不昏。賴是吾曹敦意氣。前朝文獻至今存。

遊南園懷社集不至諸公

小圃同穿竹徑來。伊人何處欲徘徊。均從故國埋神劍。不共春園掃落梅。劉子探奇虛問字。吳門遠眺獨登臺。相攜並坐松陰下。到晚猶將剝啄猜。

釣臺

桐江煙草自垂綸。豈藉貧交作貴臣。不是漢家興帝業。尋常只作釣魚人。漢家日月已重開。不坐雲臺坐釣臺。奪得天邊星一座。那思冠冕列三台。

吳王酒城

築城造釀圯還修。敵國何嘗飲是求。美酒自甘膽自苦。吳王歡喜越王憂。

採香徑

采葛辛勤聞越國。羣芳摘盡是吳王。春宮勅遍如花女。不及西施體自香。

櫻桃

櫻桃香又熟。感舊爲嘗新。薦廟皇心重。傾盤勅賜珍。琢來紅玉碎。捧去火珠勻。陵寢今何似。冬青寂度春。

泛舟五湖

一葦嘗作五湖行。直是當年蹈海情。船泊一灣吹荻火。月明千嶂引簫聲。山中雞犬猶嫌熱。世外風波定不驚。無復居陶謀治產。漁翁豈必又更名。

寄懷顧茂倫

不向金門賦子虛。獨從江海問樵漁。堂中每下名賢榻。袖裏頻開國士書。楊柳堤邊春酒共。蒹葭水上故人疎。寸心直托秋宵月。一片清輝照草廬。

韓蘄王碑

錦衣驄馬韓相公。中原殺敵多奇功。捐軀報國捧詔泣。激烈吐氣吞長虹。立朝奸相但長揖。闔外武功居

第一。八千鐵騎橫江中。龍王廟前鼓聲急。紫袍玉帶驚奔逃。稽首轅門歸不得。五百年來壯志不可磨。一碑突兀橫山立。彷彿若見公儀容。軒然介冑當風出。公之骨。埋荒墳。公之烈。存碑文。死骨生功並不朽。千秋浩氣干青雲。雄心直誓欲吞金。勒銘橫絕天山陰。講好竟爲時議奪。吳山立石非公心。但使非公血戰破敵膽。安得長江百載無南侵。嗚呼南朝自受羌戎逼。男兒幾個能戮力。賴是吾王一柱擎。扶起東南半天日。中興名將誰與倫。論功可與精忠匹。精忠不殺公不廢。兩人協力扶王室。有日抵黃龍。何難擒兀朮。有臣如此功不竟。直是奸人在君側。望公之碑起長歎。中原無人堪涕泣。

讀朱長孺杜詩辨註

小智多穿鑿。拘儒狗章句。謬將古人書。強作今人註。名義有割裂。神理無生趣。悠悠古人心。千年墮雲霧。朱子讀杜詩。冥契入寐寤。心魂爛相對。百世若面晤。批導盡迎刃。詮釋破迷誤。寧惟集衆長。妙解繇獨悟。風雅久淪亡。此道盡昏瞽。吾子唱元聲。光彩動毫素。落紙生雲煙。衆理悉奔赴。固是曠世才。亦得稽古助。天祿藏祕書。不少魯魚蠹。子若逢休明。子雲豈獨步。衡門獨註書。亦是時不遇。勿謂著述小。吾道茲焉寓。四海會澄清。才人獻詞賦。煌煌明堂篇。茲實備典故。聖主求遺書。光耀自然露。卽今懸國門。千金孰敢顧。

謁三高祠

范子破吳歸。泛舟五湖水。張翰思蓴鱸。拂袖秋風裏。江湖陸散人。壘書徵不起。三人兩貴一布衣。獨清心

事均不違。千年俎豆在一堂。迄今論定無是非。或云范子多黃金。清虛不類二子心。傾吳霸越便知止。一生事業皆已矣。天生我才無所用。末路經綸寄生理。辭官只作富家翁。貪夫取舍寧如此。英雄寄托錢刀中。蟬蛻穢濁三子同。三高祠前皎白日。三高祠內含清風。月白風清兩不猜。三高高並千尋松。東門黃犬華亭鶴。先時尊榮後牢落。百年苦欲戀簪纓。豈識簪纓寓鋒鏑。魚不吞鈎詎釜遊。黃鶴高舉誰能縛。卓哉尙志古人風。拂去塵埃入寥廓。生前不慕卿相尊。死後蕭然香火存。淫祠酒食自歌舞。虛堂樽俎空雞豚。獨有一二餐霞子。登公之堂弔公魂。酒漿只借太湖水。清香一縷微風翻。知公高情無所羨。芬芳何必蘋蘩薦。知公不耐風塵汗。請爲拂拭烟霞面。

盆梅盛開預舉花朝社集

招朋不藉百花妍。雪幹風光占獨先。春入彩箋梅有信。杯傳小閣柳無烟。漫留好句酬芳草。早攝繁華入夢天。直恐東風多妬忌。相將遮護在屏邊。

春晴

春陰忽自朗。冬潦喜今平。求友禽聲樂。尋花蝶翅輕。柳暄風欲媚。山潔黛初明。父老還垂涕。今年或可耕。

綠萼梅

綠窗窈窕掩書帷。拾得寒梅綠更宜。春信預分堤柳色。黛光直奪美人眉。鉛華滌盡開常後。蜂蝶趨妍過

不窺。自是淡妝清到骨。應翻別調管中吹。

玉蝶梅

紅梅堪擬是還非。膩粉輕朱錦作圍。紈扇不驚春寂寂。漆園有夢影飛飛。含香赤雪終兼白。素體佳人薄
衣緋。只恐魂消蝴蝶散。東風吹去爾何歸。

紅梅

一枝冷豔出庭中。瘦影寒姿迥不同。縱染胭脂非是俗。任他霜雪弗欺紅。鮮妍擬杏芳偏占。嬌好方桃葉
未蒙。絕世色香恆有妬。莫教風雨入簾櫳。

鷗

幸有江湖闊。忘機得自由。何嘗敢近世。謬許善隨舟。波靜常求侶。風高且傍洲。行藏類有道。豈是竟沉浮。

雪裏紅梅

世外朱顏欲自藏。故將純素作衣裳。冰花密覆疑無豔。紅粉兼調更有香。玉傍火齊光並赤。曲高白雪管
生涼。三更最慮芳魂怯。引領朝暉爲洗妝。

新綠

芳菲嗟已去。青翠喜初來。細葉煙經染。新條雨更催。光輕欲映水。色嫩不欺苔。薄覆差成蔭。鶯藏且莫猜。

護蘭

幽芳級佩久。豈忍聽經霜。設幔遮風厲。憑窗麗日光。暖移空谷舊。寒近讀書旁。素葉安酬德。明年發故香。

快風閣

一閣崔嵬立碧空。俯看霞氣化長虹。洞庭山色來簾外。震澤濤聲入檻中。縱有扶搖無羽翼。尙多戎馬孰雌雄。憑高直視占雲物。何處揚威起大風。

刈麥

去冬無刈穫。麥熟始趨功。慘淡三春裏。辛勤四月中。登場卽是瑞。代穀不爲豐。後苑知觀否。應多長故宮。

張志和祠

徘徊祠下想風流。待詔歸來一敝舟。天子翰林猶亢志。眞卿館穀又何求。烟波不是君家物。釣叟偏無世外儔。而我更遭離亂日。身浮豈獨是家浮。

先生尙志托虛舟。祠廟猶然枕荻洲。早隱江湖知亂兆。任從來去值安流。當年奴婢承君寵。今日風波起釣鉤。茗雪近時多鱉害。世無韓愈恣淹留。

搏虎行

造化多不仁。生人復生虎。人虎互相仇。畢竟人難侮。堪笑持兵禦虎人。談虎色變先喪神。虎來惜命競狂

走。誰知虎逐傷其身。自此咆哮無顧忌。公然入市復入城。妻喪其夫父失兒。日暮號咷聞哭聲。秦稱虎狼國。狙擊博浪驚。陳涉奮一呼。咸陽遂以傾。虎雖強暴不及秦。胡爲舉國莫與爭。不必將軍射沒羽。一夫操箠奮威武。袒裼攘臂勢莫當。錦毛披紛血如雨。爪牙摧折肉就烹。皮獻上官供寢處。向者一吼山欲搖。今來伎倆直如許。早知猛虎亦畏人。何必聞聲竄如鼠。古來強弱勢。由人豈由天。豺虎咬人正當道。男兒立功在少年。

歸鶴歌

維鶴有正氣。可與共安危。朝秦暮楚。見利則隨。鶴乃不如人所爲。人爲囚。鶴爲虜。乘軒非吾願。況乃豺狼伍。翻身入長烟。歛翮歸故土。今時勇決向者馴。醜類戒勿傷其羽。乃知全身自有智。出入險阻不受侮。歸來歸來欲何依。城郭猶是人民稀。放鶴亭前荒草積。心念舊恩寧忍飢。飢可忍兮不可辱。與人同生亦同死。不肯委身事他族。嗚呼鶴兮真骨肉。亂離多苦辛。結交多逐新。誰肯艱難際。殷勤念故人。嗚呼鶴兮真交情。

送徐介白移居入山

都市何堪處逸民。更求雲構別風塵。只留片石仍還宋。豈獨楓江不是秦。竹徑掩門人弗到。梅花繞舍四無鄰。莫言丘壑渾閒却。一代遺文屬隱淪。

滿目風塵道路難。不如丘壑境偏寬。山中甲子孤臣筆。嶺上梅花獨自看。人去楓江秋愈冷。月歸茅舍影猶寒。他年若欲聞興廢。夾岸桃林莫放殘。

盆梅歌

探梅爭向山中去。歸來梅花在何處。攜筇悵然再往尋。又被無情風雨妬。何如移入畫堂中。與梅同朝復同暮。參紅間白好商量。爛然五色成文章。六宮蛾眉羞粉黛。織女機絲避七襄。春風和送暖香。春宵永。浮羽觴。翠鳥啼簷不敢入。封姨簾外空徬徨。主人珍重慎洒掃。猶喜門無俗客擾。芳含筆墨彩箋香。紙帳孤眠清夢繞。冰魂獨契人不知。三更落月雞催曉。孤山梅落鶴聲悲。惟我堂中花正好。人生榮悴亦如花。百憂摧殘令人老。狂風細雨滿天涯。勸君閉關常自保。君不見郊外梅花亂如雪。可惜馬蹄踐獨早。馬融笛裏一聲吹。玉骨縱橫藉芳草。

鶯湖逋客歌

吾聞古之隱君子。乃在箕之陽。穎之濱。胡爲乎數里之鶯湖。乃有人兮不友亦不臣。有腰不折公與卿。日破萬卷筆有神。隱然獨抱將相器。半灣秋水常垂綸。著書不肯與人讀。藏之名山傳其人。惟昔處士多虛聲。徵書往往出紫宸。嵩山少室絕頂處。猶有駟馬馳蒲輪。鶯湖往來盡豪貴。先生何以潛其身。悠悠海內誰知己。諒無物色來風塵。黃金臺下狐兔走。泥沙委棄隨和珍。披裘翁。賣卜人。狗屠門卒皆德鄰。賢人相

聚在咫尺。太史終不聞占星。吁嗟乎。鯨鯢躍浪江海渾。蛟龍徙宅潭與津。天閉駿骨死欲朽。誰肯一顧輕千金。明珠暗投宜有怒。先生且樂鶯湖春。

題恭肅公畫牧童牛背二首

柳陰眠醒後。牛背獨歸遲。帶笠懸雙脚。穿蘆過淺漪。山橫落照處。烟裊暮春時。信口吳歌發。何須短笛吹。日夕牛來下。騎歸任自然。漫尋芳草徑。閒看夕陽烟。路熟無愆步。心恬不着鞭。可憐馬上子。流汗濕香鞵。

方竹

孤貞衰世少。有竹骨偏奇。圓轉成風後。剛方欲式誰。材違稽箭用。製乏馬融吹。幸不諧人意。應無翦伐悲。奇筠寧敢褻。耿介自天成。節幹數莖老。鋒稜四面生。風敲終不壞。石角會相迎。月下徒看影。幾埋方正名。

歸田園居

衡門逐野徑。溪流自迴抱。鬱鬱五柳中。頽然隱一老。樹藝亦有經。此理必蒐討。荒穢毒我苗。雨露占偏早。辛勤勸妻子。荷插不俟卯。藉草讀素書。壺觴或傾倒。村夫與野婦。恭謹謂兄嫂。有時羣泥飲。轉覺粗莽好。獨負夕陽歸。悠然送昏曉。

深柳隱竹籬。茅舍喧雞狗。長揖謝公卿。歡洽締村叟。釀錢買豚蹄。再拜祝大有。春苗膏陰雨。荷鋤敢獨後。芒鞋敝欲穿。短褐時露肘。鄰人憫予病。呼共酌春酒。謂爾嘗作官。毋乃傷貴手。斂容致區區。爾意誠乃厚。

行役二十年。傾覆見某某。況乃遭亂離。安敢棄南畝。南畝幸不荒。簞笠亦何醜。

贈姜卿墅給諫

昔年直諫敢攫鱗。流落天涯竟十春。文獻大儒羞制禮。漁樵小隱不文身。江南絃管多新譜。漢代衣冠少故人。試聽琵琶吟夜月。知君共我一沾巾。
秦離應共泣殷宮。湖海相期意氣同。獨挾孔書來魯壁。直教吳國聽齊風。少年諫疏遭逢薄。白首交情道路窮。江左六朝遺恨在。小窗細語夕陽中。

懷顧樵水

梅花作賦正春寒。別後幽香又發蘭。美女採蓮貽玉佩。騷人啣璧拜詞壇。賓筵體酒分家設。夏屋魚餐是處安。一曲廣陵人識得。篋篋隊裏莫輕彈。

題顧樵水畫採桑美人三首

羅袂小筐輕。盈盈陌上行。直教家去怨。何止看來驚。閨質應無遇。佳人自愛名。短窗瞻畫影。猶是坐觀情。綺陌春光麗。嫣然絕代姝。明知皆有婦。見此盡成愚。花氣飄纖鬢。香風動短襦。只因夫婿好。不羨使君殊。色動浣紗石。魂消羅襪塵。只憑虛作想。何況寫來真。妙染曾題顧。姣人本姓秦。至今縑上影。猶惹室家嗔。

和諸公月下看梅

黃昏浮動氣雖好。爭似冰輪湧夜光。一鏡出塵花作魄。三更入夢月爲妝。飄來冷韻非關桂。攬得寒輝盡是香。第伴霜姿同臥影。不妨夕露濕衣裳。

贈潘聖木移居仍居平川

霜禽暫向短松眠。更結危巢百尺巔。移去老梅凡幾樹。袖來黃石只殘簫。冰心湛出鶯湖月。浩氣蒸爲震澤烟。仙曲溪光堪入畫。輞川之後畫平川。

贈張幼素

秦灰燬後微言絕。張氏春秋大義存。弟子執經陪雪夜。天人有策對金門。劍方伏匣星文動。鯤未搏風海氣昏。一賦受知應貴紙。諸生壇坫孰爭尊。

題桃花源

一自漁翁識避秦。山中又復紀千春。世間多少興亡恨。不及桃源洞裏人。未必桃源絕世因。只緣人自戀紅塵。千家雞黍難留客。冷落溪邊孰問津。

題高山茂竹

山裏人家世外心。林端飛瀑冷侵襟。迴流遶砌渾成碧。一曲寒溪盡竹陰。

題秋景小舟垂釣

漁翁小艇如蛺蝶。只用秋風不用楫。等得鱸魚上釣絲。前村換酒看紅葉。

又題秋景

茅亭竟日閒。坐臥丹楓裏。碧澗冷松聲。高雲掛秋水。

題深山紅葉

幾曲寒溪鳥徑賒。楓林深處有人家。秋山落盡丹霞色。碧澗浮來錯認花。

題深澗水亭

溪邊橫小閣。閣下響迴湍。石壁當窗立。松高落影寒。

題平坡芭蕉松樹對客彈琴

坐來草軟坡平。蕉下泠泠琴鳴。彈罷不知曲盡。松間捲起濤聲。

題仿梅道人筆

身似虛舟本無繫。生涯只作煙霞計。巖石俱成熊虎形。溪流直走龍蛇勢。幾箇茅亭處處登。一條竹杖朝朝曳。衣冠盡染老青山。飽歷春秋不知歲。

題范梅隱畫梅歌

有梅一幅掛在室。寒窗凜烈香浮出。借問誰之畫。云是范子筆。范子安貧志潔清。嗜梅不亞樓東人。咀嚼

霜雪澆其英。老幹爲骨花爲神。臨池不作丹青伎。儵然命意自寫真。緣茲顧影還自惜。未肯風塵輕一擲。世上亦無明眼人。不喜清高無色澤。合贈孤山處士家。詎堪持獻王侯宅。從來至寶不欲銜。下和獻璞世所賤。古劍沉埋光愈奇。牛斗之間氣如電。吾子畫梅人不知。身旣隱矣文奚爲。卷君畫。同君詩。藏於山之阿。水之湄。千秋百歲後。必有人知之。

詠蘭

移來空谷裏。逸思滿三湘。入操琴俱韻。題名夢亦香。品因高士貴。馥爲靜時長。夏日雖云烈。清芬自送涼。暮春邀樵水。公安開期諸君集。南園次樵水韻。

晴日幽香緣圃聞。行溪迷處有橋分。松低巖下青浮水。亭隱山阿靜宿雲。選日拂苔題有句。隔花呼酒醉攜羣。陽春三月傷遲暮。共倚闌干戀夕曛。

題畫

空山碧落澗雲中。只許漁翁一葉通。沽酒不從塵世飲。攜來嶺上聽松聲。

題美人折梅圖

美人曉妝罷。階下折梅英。春筍緣條軟。秋蓮點地輕。因愁霜氣重。尤畏晚風生。妾意憐花早。夫君獨遠行。

庭蓮

薄植幽窗下。寧嫌吐豔稀。芳姿嬌曲檻。香氣襲書幃。水渴添晨汲。紅殘歎夕暉。何如採蓮渡。狼藉棹歌歸。
庚寅夏六月二十有四日。茂弘昆弟邀諸君子。觀荷茅家莊。樵水繪圖。併作詩以贈。次韻屬和。
漠漠平波失淺沙。一湖紅碧水光遐。舟迴曲渚常依柳。袂染清香爲拂花。鷗浴不驚輕棹穩。笛聲欲斷晚風斜。傳杯莫慮村醪盡。煙樹蒼茫疑酒家。

七夕戲詠

年年織女渡秋河。料是龍章課未多。若使玉皇勤杼軸。直須勾喚到姮娥。歲歲銀河只一過。女紅本分怕蹉跎。若教機杼僉丁壯。那管牛郎不慣梭。
銀漢迢迢風露多。攜將機去却如何。天邊想亦開官局。不許私家動一梭。銀河風浪苦辛多。更替無門奈若何。玉帝若傳開教令。不知坑陷幾仙娥。

戲代織女答前歌

終歲機絲一渡河。歡娛偏覺此宵多。兒家況是無傾蕩。牛背生涯只一梭。

初避人

試學新妝作墮鬟。從今繡閣啓常關。纔調鸚鵡疑旁覷。剛到鞦韆便却還。春思漸開應解恨。黛眉初畫乍羞顏。自來嬌小多嬉戲。頻向蒼苔印兩彎。

睡鸚鵡

鸚鵡何嘗解巧辭。主人有舌強爲師。因逢歌罷聰初息。獨遶洲邊夢儘奇。曲檻人窺魂寂寂。高簷風軟覺遲遲。階前應有深閨語。逗洩春光幸莫疑。

半睡

日斜獨上合歡牀。春睡何曾足海棠。鶯語喧來迴夢近。翠翹驚墮整鬟忙。枕痕印玉看生暈。秋水停波乍啓眶。憔悴一如宮苑柳。三眠三起日徬徨。

遠鐘

何處疎鐘感客聰。依稀聲在翠微中。寒江夢斷牽愁聽。古梵敲殘隔嶺通。未必山僧能振響。或因風雨自吟空。回思昔日天街晚。隱隱鯨音出帝宮。

病鶴

豈墮凌霄志。天寒風雪初。羽衣難入夢。仙島未啣書。危石扶來瘦。霜翎影去疎。清貞憑砥礪。寂寞又何嘘。

庚寅九日風雨志感

便得秋光亦自傷。況逢風雨阻萸觴。青山憶舊空留夢。黃菊圖來僅借芳。連失昌期因遇九。目迷煙霧豈生陽。天公有意憐雞犬。不放登高獨避殃。

蜂

公然占盡百花香。猶挾兇蜂肆螫殃。只爲饑夫貪薄味。任他驕縱漫稱王。

酬徐介白步韻

人情競逐東流去。吾子常存故國哀。名刺莫投神獨峻。徵書不赴寶長懷。新詞唱徹佳人口。何日吟同曲水杯。霜露伊人時悵望。山陰舉棹莫空來。

酬朱長孺步韻

不從塵世問炎涼。滿案琴書繞筆床。火照青藜傳竹牒。光潛神物臥干將。交情每托書雙鯉。見面須傾酒十觴。一片冰心誰與共。空來寒月映池塘。

紫牡丹忽開與黃菊同供瓶中分賦 庚寅十月

驚看魏紫伴秋芳。十月風光亦載陽。不逐繁華矜國色。却隨隱逸傲寒霜。宮人剪綵慚多事。籬下開樽別有香。洛苑芳菲原是夢。勿愁春到反淒涼。

酬安仁叔祖索畫

庭戶悠然不染塵。閒情慣與墨池親。偶圖漁艇思垂釣。愛寫桃源想問津。舊日江山留紙筆。一腔愁恨托松筠。丹青遠愧先人手。奈有詩郵索畫頻。

題顧茂倫濯足圖

箕山之水清見底。昔日賢人洗其耳。吾生濁世多塵埃。且向清流濯吾趾。不躡帝子足。不脫殿上鞵。坐對清風弄流水。白蘋綠荇相搓摩。高山兮峨峨。碧草兮盈坡。下有蒼苔斑蘚之白石。上有成陰偃蓋之松柯。吾聞漢王洗足兩女子。酒徒一揖便倒屣。此間嘯傲寂無人。浩歌一曲滄浪水。濯復濯兮趣正長。山中流出胡麻香。仙源一洗伐毛骨。回看城市塵飛颺。從來石橋不易度。只今換得凌雲步。芒鞋淨拭無纖埃。飄然獨入天台路。

題顧樵水聽雪圖贈孟介如

奇材不可致。真氣自相索。所以琴材取之萬壑松。攜筇獨聽寒崖雪。世人聽琴不識琴。豈知雪裏有琴聲。從教斲取成奇器。人間只羨焦桐名。今日獨自聽。他日還自彈。瀟湘一曲水雲寒。孤高不嘆知音難。不爾欲人知我松雪好。胡不邀人同向雪中看。人看我聽真奇絕。精誠往來不可說。雪滿山。松滿山。胡絲識得聲清越。

移竹

昔從鄰宅分青翠。此地移來不費工。忽覩鳳姿翻徑外。直令龍勢走空中。月因疎隙開新影。鳥失寒梢覓舊叢。總是綠陰施要遍。何妨點綴互西東。

補種蘇堤桃柳

湖上長堤久失春。誰培桃柳最鮮新。前朝景物難回首。太守風流托後人。仍聽曉鶯啼綺樹。不教汗馬踏香塵。上林花鳥今誰主。惆悵堤邊落淚頻。

題鄭所南墨蘭卷

蘭之清芬世莫比。不似凡花媚人喜。風標獨與高士親。世人謬愛徒然耳。嗚呼蘭兮真君子。嗚呼鄭公真知己。公之季。腥風吹。披裘釣澤。厥志不墜。孤芳矯矯。氣若蘭。悠然獨抱瀟湘意。拂我紫硯田。揮我老松煙。墨花片片落素縑。疎風淡影相聯翩。陶潛菊。籬下俯。茂叔蓮。風前舞。吾蘭可敬不可狎。詎令若等同儔伍。更憐丰韻獨出塵。不令芳根麗黃土。筆端磊落寫出高士意。嫉邪去穢心獨苦。春秋筆削垂編年。此卷褒誅亦卓然。芳蘭自命托意遠。出處大義何其嚴。嗚呼鄭公真君子。嗚呼蘭兮真知己。

詠盆中紅梅

孤芳曾向嶺頭分。移近書龕更不羣。冷豔自來嬌面妬。暗香奚待夢山間。黃昏瘦影依紅燭。曉日清簾宿紫雲。偏自朱顏容易改。何堪長笛吹紛紛。

蜀葵

蜀葵獨少故鄉情。移入江南競向榮。方物不聞三峽貢。凡葩猶帶兩川名。依階種別難稱錦。傍日心多各

自傾。更是芳菲能變換。今年色較去年更。

南園累石

五岳難平方寸中。閒居疊就小崆峒。石移海上愁精衛。手植雲根嘆鬼工。每跨竹溪通鶴徑。也留洞口待漁翁。山成欲具衣冠拜。獨上危巔嘯晚風。

競渡詞

五月競渡遍江東。旌旗閃眼連艨艟。鳴鉦伐鼓如雷震。喧呼直撼馮夷宮。相傳屈原沉水底。水怪奪食多相攻。吾聞此事髮欲衝。人間水府總夢夢。生想効忠不食大夫祿。死後胡猶未許角黍充朝饗。蛟龍本自稱神物。何亦嫉賢害正乃與讒夫同。屈原不敢訴上帝。豈亦下類闇主無真聰。快哉澤國多英雄。舟師赴赴乘長風。誰帥此師是周處。殺盡水怪江欲紅。鬼神事有無中。世間正氣原不死。千古傷心三閭忠。年年五月如聞江上哭。義憤直欲驅蛟龍。爭投角黍淚洒空。豈必真飽大夫胸。哺糟啜醢既不肯。何事餘粒關情濃。嗚呼迂儒說夢真愚蒙。

贈王遜之西田農隱詩

豈是才高愛隱淪。祇憑南陌謝風塵。輞川空築宜看月。谷口雲封獨伴春。村社歲時猶記漢。仙源花竹竟無秦。東山此日雖安臥。恐有蒼生引領頻。

讀忠武鄂王傳五十韻今刪十二韻

宋室諸陵盡。於昭忠武祠。遺容人盡仰。古傳讀增悲。華髮登壇早。中原決勝奇。燕南趨父老。河北偃旌旗。睡手神京復。盟心白日知。軍符驛使急。野哭馬蹄遲。敵愾功垂就。師旋勢乍移。還虞和議梗。不顧獄詞疑。裳裂刊膚字。廷誅訟柱詞。大星宵隕海。醜虜盡張鷗。嗟我王忠孝。關茲國盛衰。天言絕浩飲。主辱却名姬。治第家羞問。酬功賞不私。飢寒軍令肅。文武訓言垂。雪恥心誠壯。殲仇志詎欺。犬羊盤帝座。鬼蜮伏丹墀。忠勇全無顧。隄防豈及施。用兵雖忤敵。講好亦因誰。不是軍難撼。寧真虜易綏。但教辭節鉞。猶隱係安危。霧豹藏山澤。潛龍自委蛇。壯夫纔伏劍。酋長便揮卮。自壞干城器。先摧柱石基。他年甌盡破。此日祚潛墮。固是臣奸大。還因主德虧。知人宜在早。成效況如斯。自昔臨刑日。猶非脫穎時。身微蒙識獎。功大見誅夷。果有疆場志。寧無將帥思。讎捐三世辱。氣短一隅規。覲面爲天子。蒙心作太師。手書隨意出。阿柄竟誰持。專殺猶無問。中原豈克爲。一時公論滅。千載正人咨。祠廟留荒碣。松楸響暮颺。手揮吊古淚。競咏斷腸詩。澤畔傷漁父。肯江泛子皮。生無明主遇。俯仰盡淒其。

弔梅

庭前有益梅一株。號沉香玉蝶。其花疎越芳烈。與凡種異。老幹縱橫。苔蘚班剝。蓋百年物也。乃以蟻吭多竅。爲蟻所穴。夫梅性至潔。蟻羶物也。羶羶實偪處此。梅何以堪。遂枯死。梅可謂義不受辱者矣。周子感其

貞。哀其非命以死。乃掘土出蟻。盡滅其族。爲吾梅復仇。而爲文以弔之。其詞曰。人老則疲。梅老斯奇。蒼皮古幹。橫偃斜披。其花發也。如老僧之登壇說法。而天花亂落。其彫也。如米顛袖中之石。峯巒縱橫。洵美可樂。人愛其華。我愛其質。不媚不織。有典有則。評梅以品。此品第一。羣梅環拱。莫敢與匹。譬彼岱岳。諸峯却立。奈造物之忌完。類名盛而毀集。爰有惡物。匪賊匪孟。其名曰蟻。惟羶是求。樂老幹之多竅。兼餘香之尙留。舍其南柯。是宅是休。嗟嗟我梅。至芳且潔。玉潤珠瑩。冰清霜烈。微蜂蝶之敢欺。胡腥羶之可穴。污莫斯污。義不苟活。類焉以悴。香魂飛越。傷哉乎。忠臣節婦。月日爭光。蟬蛻穢濁。死更留芳。我梅雖隕。孤韻猶香。時周子避賊于居之東。倉卒未訣。越數日而訃聞。頓心摧而目裂。爰命童子。批根發穴。殲其蟻王。殄彼餘孽。僵尸億萬。種盡卵滅。奉告花靈。庶慰且悅。詞短情長。再歌一闋。

古幹庭欹臥。無華儘自奇。羶趨纔有妬。香魄竟長辭。高士琴聲苦。黃昏月色悲。親讎寧速斃。節義爾能爲。

望洞庭

洞庭秋爽盪心胸。只恨銀濤隔一重。縹緲出雲迷橘柚。蛟龍騰氣隱芙蓉。遙思仙字題林屋。欲入靈山問禹蹤。明月泛舟應似昔。洞簫聲咽冷諸峯。

除草

造物驕陰氣。庭水深至膝。蘭菊盡淹腐。惡草獨繁殖。隕霜蒙不殺。春夏轉茂密。高秋雖在望。縱橫勢亦一。

謬奪造化權。課彼童僕職。清淨期在眼。芟除盡其力。斬伐纔畢事。根苗復橫出。匪邪不畏誅。上天似姑息。陰雨日滋培。太陽永西匿。惡種正逢時。正氣詎能克。卽今畎畝中。萋稗盡充塞。庭花誠小事。會奪生民粒。吾無門外營。飢溺不遑恤。階除聽主人。荒穢是誰失。驅除乃有功。矜全未爲德。呼童再舉鋤。滋蔓嗟何及。

虎丘

虎丘絃管盛前朝。花市山門擁畫橈。自有健兒晨躍馬。更無美女夜吹簫。真娘古墓魂難返。霸主英靈氣已銷。只得生公臺上月。仍含石影照秋宵。

采藥

秦皇漢武求靈藥。孜孜苦向蓬萊索。樓臺棗脯日繽紛。不見神仙垂一諾。誰知神仙得道後。勾漏丹砂亦塵垢。若其服藥修煉時。此種原是人間有。齋心獨荷鋤。芒鞋入洞口。黃精滿山芝成藪。千年茯苓大如斗。此中每有神物守。我求靈根心至堅。精誠感格虎豹走。鞋穿鋤破攜得歸。韓康市中曾見否。修合吞咀百病驅。辟穀食輕身軀。千年百歲精不枯。待得成道飛蓬壺。試探囊中之藥有也無。從仙索藥胡愚乎。

庚寅夏日自題畫松

鱗甲蒼松古。風雲變老龍。自含霄漢氣。不受大夫封。

月夜泛舟鷺脰湖

一輪如鏡落平湖。搖曳扁舟入畫圖。寺湧鐘樓煙際出。臺浮樹影月中孤。簫聲欲下悲秋淚。龍女遙傳不夜珠。恍惚不知村市近。擬凌牛女到天都。

靈巖懷古

西子傾吳山不傾。琴臺娃館尙留名。迴廊窈窕環聲動。織指玲瓏石蘚輕。不是屬鏤曾殺士。何妨歌舞略鍾情。試看宵旰猶亡國。那有離宮遶帝城。

種松

奇松匪易致。已喜植庭陰。護惜原無用。冰霜自莫侵。選朋唯置竹。寫籟早安琴。春草年年換。多君不變心。

寒夜剪刀

霸露頻催寄遠情。佳人夜作剪刀聲。吳絲膩滑裁來軟。玉指纖柔落處輕。淚洒燈前人不見。響傳窗外聽偏清。更殘寂寂知歸寢。料是衾寒夢不成。

讀井中心史 鄭所南著 鐵版沉于井底。

宋室綱維絕。匡山風雨悲。犬羊隨地是。節義欲何之。正氣孤逾迥。先生志獨持。葵心傾報國。董筆寓攘夷。宋曆編年永。胡天削號卑。褒忠血淚下。討逆劍光馳。白水覘龍氣。殷宮泣黍離。春秋義有在。冠履係於斯。壯志無同者。寒流獨付伊。光芒驚水魅。凜烈走妖螭。鐵石心常照。蛟蜃護不欺。忠魂呼上帝。天命掃羣鴟。

九世讎方雪。孤臣涕尙漉。夜泉騰瑞氣。古匣起深池。字挾魚龍勢。光搖霹靂隨。丹誠真不朽。名義果堪垂。在昔殲胡日。在緣出井遲。痛深方借筆。憤極始搗詞。殺賊心無恨。遺編伏固宜。乾坤將復暗。英爽遂前知。特躍風霜字。先爲撻伐資。千行排鐵騎。百戰隱毛錐。帝子符猶伏。旄頭運已移。文成一代史。忠作萬年維。昔直吞驕虜。今如列義旗。開函欽直筆。羞世少兒男。應有雲臺客。功名奮虎熊。

水中雁字

澄川歷歷映征鴻。鳥篆縱橫似碧空。塞上有書傳繫帛。波臣何信寄西風。蛟綃難擬迴文字。魚腹奚煩尺素充。暫得俯看江畔影。錯疑身入九天中。

採蓴

兩岸看楓一葉憑。蓴絲芳潔水天澄。若論弱蔓無多味。何事秋風感季鷹。楓滿江臯荻滿灣。秋風一葉採蓴還。亦知世上名堪戀。爲怕思蓴不出山。

青陽渡

妾家有高樓。前臨大道口。淡蕩晚風搖。青陽渡邊柳。柳絲何裊裊。腸斷春歸早。玉鏡任塵封。紅顏空自好。君行心未知。恍惚夢還疑。感君纏綿意。憔悴不敢辭。願作柳絮飛。飛絮逐人衣。願作天邊月。隨郎共圓缺。金尊待君倒。花落留君掃。出門望馬蹄。愁思縈春草。日暮君未歸。空房聽子規。

楊花

楊花飛。輕輕裊裊沾人衣。東風吹去不復回。遊子遠行何時歸。楊花落。捲入人家度簾幙。可憐不向玉塔留。纖手舒衫承不着。楊花留不住。願逐楊花去。去去空有情。夢遶堤邊樹。年年三月落花天。顧影含顰。自憐。

佳人

美好多不完。失意在蛾眉。丈夫遠行多愛寵。閨中少婦長相思。長相思。泣沾臆。寂寞空房閉寒日。春郊不作採桑行。五馬使君識不得。蓮舟女。何聯翩。新粧照水皆嫣然。佳人竟日無膏沐。獨抱高樓孤月眠。芳蘭空谷自泠泠。不與桃李爭鮮妍。吁嗟明妃皓齒埋青草。紅顏歡樂從來少。但使兩心事一夫。縱有長蛾終不好。他年彤管有貞名。何妨獨守空閨老。

霜哺篇

寡母抱孤兒。胸懷常惻惻。伶仃既可憫。況是無知識。恩勤不言劬。兒幾時成立。兒壯憶母慈。涕淚橫胸臆。母孀值盛年。忍痛至今日。有子不養母。辛苦更誰恤。母寒兒忍衣。母飢兒忍食。寢門日三至。每飯不去膝。百年父母存。樂事誠第一。所以節孝名。君子不忍得。豈知聖賢理。處變愈不忒。家庭有不幸。名義由是植。不聞古大孝。昊天有號泣。

漁父詞

江湖之濱有異人。諸侯不友帝不臣。扁舟浩蕩不知處。出入風雨隨其身。馮夷河伯結徒偶。生殺縱橫出翁手。鯨鯢不敢惜子孫。垂竿撒網蛟蜃走。或聞愛讀楚騷詞。投江痛哭血欲嘔。得魚寧獨醉春醪。不向城中換美酒。俗眼驚看不識名。明月清風一老叟。昔聞賣卜補鍋賢。此翁氣類相先後。明王或獵渭水濱。有才終老漁船否。嗟乎漁翁設網莫使白魚逢。有時躍入聖主之舟中。亦莫學豫且之困龍。會看鱗甲變化騰起乎長空。海晏河清應可俟。釣叟寧惟一太公。

空城雀

殺氣纏都邑。城中列旌旄。蕭條煙火稀。羣鬼聞夜號。鸞鳳惜羽儀。徘徊千仞高。玄鶴去不歸。鳴和在九臯。雀無鸞鳳姿。空城自翔翺。亦知飢欲死。寧死不敢饕。郊原多腐肉。任彼烏鳶逐。深山棗栗豐。而有鴟梟伏。嚴城聚刁斗。十年矜積穀。中多射雕兒。利鏃將穿腹。依人本有情。哀叫誰知苦。啣環詎無力。受恩匪敢輕。所向無一可。不如守空城。空城聊飛飛。儔侶日嗟稀。薰蕕本殊性。出處寧同歸。啁啁語衆雛。相守莫相違。解網有至聖。飲啄可忘機。

壽子敷叔七袞歌

歲甲午。月仲春。吾叔生辰在此辰。猶子捧觴介眉壽。請歌長歌與叔聽。吾叔同枝有七人。長枕大被如一

身。其中吾父更相好。父貧叔每周其貧。父生我兮叔抱我。提攜鞠育父也均。吾不學。吾父噴。叔誨之。惟諄諄。吾忝科名得升斗。念叔造我如鴻鈞。五十年來黃臺瓜已再三摘。一翁獨老桃源春。叔性不與紛華逐。清淨無爲返其樸。春風春風遍里閭。肅肅雍雍迨僮僕。寶惜鋒鋌不輕試。豪強折服不敢觸。迨乎桑海忽變遷。傷心故國同陵谷。松菊悠然常閉門。一榻庭前自花竹。商山皓首不越召。釣竿永臥磻溪曲。江南服製多好新。故老衣冠端在叔。含醇守一自長年。何必天台問仙籙。世之人。苦多慾。與之福。不知足。數奇終是不封侯。服餌金丹還自促。豈知吾叔陶陶一室樂。天真衡門自有添籌屋。三十年前石麟頭角真崢嶸。又見諸孫遠膝羅羣英。老翁日日開口笑。坐看槐樹生庭陰。

丹青引

丹青吾祖稱入室。石田先生是其匹。近時顧子亦奇絕。硯池往往蛟龍出。吾師吾祖亦師君。練光如水常潑墨。神州無數大山水。古往今來只如許。獨有胸中丘壑深。山山水水無窮已。吾昔年少希丹青。瞥眼蹉跎吾老矣。看君筆底煙雲生。那得見獵心不喜。污盡人間百福綃。拙手全欺半張紙。畫山不畫泰山松。松今已受秦皇封。畫水不畫躍水龍。龍今螭屈滄海東。但作深溪小茅屋。傍添一箇持竿翁。若問持竿釣者誰。是吾小子真形容。吁嗟乎。男兒事業類豹變。何事區區營匹練。麟閣丹青文彩多。他人爲我開生面。我今自號漁樵形。寒風颯颯飛霜霰。百年壯氣埋蒿萊。屑屑乎一邱一壑哀乎哉。

東湖吟

東湖賣柴一樵父。沐浴聖恩能幾許。忽聞皇家革大命。慟哭舉身付水滸。男兒肯捐生。亦圖身後名。樵夫死得最凜烈。何故姓氏無分明。或云當是隱君子。野人未必能如此。仁義之心皆有之。匹夫感激何不爲。生平不讀孔孟書。偏爲天壤留鬚眉。噫嘻。湘江濱。識屈子。東湖樵。竟誰是。樵夫只留一片心。此心盡在東湖水。東湖東湖。直是樵夫滿腔血。湖可竭。樵夫之心不可滅。

以鳥鳴春

禽鳥生亦微。豈知悲失路。春郊自蕭條。鶯燕仍如故。獨我愁人聽。哀鳴若有訴。風雨捲殘花。廢院荒煙度。微生固有情。亦自傷春暮。若令解鳥語。應聞斷腸句。試看巢木燕。寧復相歡哺。提壺欲聽鷓。閒愁滿春樹。

同聲歌

海水蕩蕩。衆流所歸。泰山巍巍。衆山所依。德苟服衆。因患知希。古之君子。匿名是飾。憂德不立。精美內含。光華外溢。鄉國天下。皆從風。何嘗標榜。稱膠漆。今人結交。意氣輕。面是心背。還相傾。但嗟古道。棄如土。不知感召。原非真。君不見。仙舟龍門。傾士心。伊川濂溪。學問純。千載以下。盡宗仰。何況當時。親炙人。如彼宮商。異絃同鳴。如彼簫韶。百神皆歆。石鼓風聞。數百里。雌雄劍合。延平津。非有期會。使之合。其中往來。自有神。區區孤陋。六尺身。僕僕欲交。天下士。徒令杯酒。生風塵。嗚呼。今人古道。棄如土。直由感召。原非真。

對酒

對酒不能飲。吾生遭百罹。蹙蹙靡所騁。歲歉糶不收。醪濁杯盤冷。朝看風雨惡。宵聞鈴柝警。良朋天一方。蕭蕭獨顧影。對酒不能飲。對酒不能歌。人生能幾何。老驥久伏櫪。壯志空蹉跎。哀思動江南。新亭涕復多。吞聲兩三杯。潦倒顏如酩。對酒不能歌。對酒吾欲嘆。長夜何時旦。玄黃戰未休。腥風千里暗。鯨鱷滿汀洲。驚竄鄰里散。敲髓骨欲枯。繭絲抽不斷。拚飲醉如泥。通宵酒力半。安得生羽翰。搏風入天漢。對酒吾欲嘆。

秋風引

秋風起。梧葉驚。草木蕭瑟感客情。蟋蟀夜吟而訴怨。哀蟬淒咽而吞聲。思婦悲重扇之落葉兮。縫衣裳而寄遠人。士有羈棲失路而不得志者。傷遲暮而霑巾。人生壯盛何足數。暗中倏忽流年度。歌臺舞館正驕奢。朱顏華髮旋非故。君不見秋林搖落秋山素。芳菲桃李今何處。蒹葭霜露天一方。衰楊殘荻迷荒渡。一行羈雁影嘶寒。斜陽落照愁雲暮。

壽調甫兄廷燕

六十齡來聞道早。只今端不負居諸。少年未售干秦策。白首仍窺映雪書。寶劍光寒埋愈顯。將軍善飯老猶初。明時會有非熊兆。未得投竿且釣魚。

祝顧樵水尊人六十壽

堂前白髮樂天倫。令子風流迥出塵。身未許人因有父。雞堪作膳不供賓。爭看綵筆疑萊舞。競買青山知管貧。至孝不須陳鼎食。一壺清酒薦鱸鱖。

壽仲烈兄五十初度并遷居

岡陵方進頌。歌吹繞華居。喬木堪棲鶴。高樓待著書。東籬南岳近。椿畔桂英舒。何必蓬萊島。仙風足我廬。

悼丹銘兄字仲烈

旦暮升沉在一官。有才無命實難安。因傷故國頻多淚。料入黃泉也未乾。郊外乍聞新杜宇。庭中空設舊衣冠。男兒不遂匡時策。熱血何能死便寒。

哭父

傾家留得舊書香。辛苦憐兒膽自嘗。纔獲君羹添肉味。詎堪國破又親亡。九原不釋南冠恨。殘篋空餘豸繡裳。更是魂歸啼有血。伶仃幼弟尚成行。

望雨

年年洪水欲懷襄。不料恆暘又作殃。牲璧自難驅旱魃。征求何未殺弘羊。一聲喚起南陽臥。三日期傾太守滄。魯史大書六月雨。詎堪斯際慰徬徨。

落漲

滔滔每恨禹功遙。却縮洪流似射潮。雲氣乍含新旭暖。夜濤差減舊時驕。初回龍怒猶留窟。暫許蛟人未贈綃。誤認馮夷收浪穩。農家珍重護春苗。

落葉聲

霜林捐故葉。撼撼下庭中。別去疑多恨。淒音盡托風。輕拋敲石砌。斜擲響簾櫳。更是秋燈夜。颼颼雜暗蟲。

伴羞

芳心不自守。作意故相迷。解語櫻桃澁。多情秋水低。當筵斜粉項。擎盞覆春蕤。香燼蘭燈暗。郎君任久俟。

楓江來白燕

王謝堂前見獨稀。楓江何自致奇輝。垂虹亭畔虹翻碧。浮玉橋邊玉乍飛。素羽穿簾雲影亂。銀翎掠水練光微。吳宮臺榭猶飄泊。寂寞孤城何處歸。

題天寒有鶴守梅花

仙翮羞居俗士傍。却從孤寂鍊清光。嚴霜凍萼遲輕舞。瘦影依墀度暗香。恥有軒車囚傲骨。肯隨鸚鵡啄餘梁。昔年放鶴人何在。獨伴寒華自感傷。

喜顧樵水至

此詩由未刻遺珠集中采入

閉門半載不梳頭。此日逢君解百憂。鴻雁尙能思舊國。鳧鷗且喜聚中洲。明明心事皆如月。淡淡交情只

似秋。一榻共眠通夕語。聞雞空自起邊愁。

題柳堤小樓平遠山浣溪紗

水滿橫塘拍畫橋。綠楊扶出小樓高。遠山一帶碧如描。芳草堤邊鶯語碎。落花影裏馬嘶驕。去年寒食又今朝。

題梅花草舍菩薩蠻

茅簷純是梅花壓。照來一片黃昏月。月下讀書人。直教冰作魂。寒芳入夜凍。紙帳初回夢。肌骨盡生涼。詩成句也香。

丹青引贈顧子以下七首由未刻吳江詩粹中采入

山莫畫泰山松。松樹已受秦皇封。水莫畫黃河潦。河流已非夏后道。但作清溪竹樹灣。添我垂釣于其間。吁嗟乎。男兒少壯隨朝彥。豈料中年桑海變。枉想丹青麟閣中。他人爲我開生面。顧生顧生爾莫嗔。傳神似爾畫逼真。如何貌此非常人。

韓蘄王碑

西湖湖曲騎驢翁。中興十將稱最雄。道逢姦相但長揖。斯人豈比張魏公。鄂王英武庶其匹。時危協力扶王室。龍王廟前金鼓震。遺恨書生黨兀朮。公之骨埋荒墳。公之烈存碑文。華堂鐵券雖已失。千載猶傳趙

雄筆。

徐電發云。辭不多而激昂流轉。斯人
豈比張魏公一語。足慰蕪王于地下。

鄰翁邀食五月桃戲作

桃實纍纍也足豪。主人笑釘玉盤高。仙家一熟三千歲。五月先嘗遜我曹。

盛澤

吳越分歧處。青林接遠村。水鄉成一市。羅綺走中原。尙利民風薄。多金賈客尊。人家勤織作。機杼徹黃昏。
過徐介白上沙村居

近水垂楊裏。人知處士家。有山皆到牖。無日不看花。鄰叟遺鮮菌。山僧供早茶。彥方居未久。風俗自清嘉。

聽雪吟與「題顧樵水聽雪圖贈孟介如」一首。略有不同。

奇材不可致。真氣自相索。琴材取之萬壑松。攜筇獨聽寒厓雪。世人聽琴不識琴。豈知雪裏有琴音。從教
斲取成奇器。雷威千古稱知心。今日獨自聽。他日還自彈。瀟湘一曲水雲寒。孤高不嘆知音難。松雪人盡
看。聽者真奇絕。雪滿山。松滿山。何由識得聲清越。

笠川子曰。雷威每遇大雪。往深松坐。松樹
下。聽其聲之悠揚者。伐之爲琴。名曰松雪。

觀樵水畫山水歌

人將山水比畫圖。畫圖功與神工俱。世人胸次徒區區。狼藉點染胡爲乎。顧君五指疑有鬼神役。攬得雲
煙滿几席。畫水真令蛟龍騰。畫山恐是巨靈擘。更逢斯世多風塵。痛惜江山輕一擲。筆端灑出清世界。掃

盡榛莽無留跡。此意深遠誰得悟。道高每遭俗眼妬。懷緜抱素日盈門。顧君掉頭終不顧。祇是我輩素交人。淋漓潑墨常無數。染翰不賣獨自珍。吁嗟顧子宜其貧。貧其身。不貧有識有眼人。他年百歲後。敗紙敝絹如黃金。我欲寶之常什襲。猶恐神物變化尋之不可得。

送顧茂倫遊越州

山川越國伯圖留。曾試絃歌憶昔遊。細柳旌旗新幕府。冬青風雨舊林邱。花明梅市尋高士。瓜種青門訪故侯。仍是壺觴修禊地。傷心往事付東流。

正月十五盆梅盛開諸同人雅集分賦

催花風信入新年。星聚良朋月正圓。豔手千堆香作霧。華燈一片玉生煙。歌傳才子陽春調。坐有佳人姑射仙。雅會還期十日飲。月泉吟社續詩編。

附錄一

觀荷賦

壬辰之夏五月。周子與客晨起泛舟。觀荷溪畔。時則曉月初沈。朝暾未發。胭脂尙濕。乍瞻睡起之容。珠露猶擎。可飲延年之屑。清香徐來。丹霞四徹。客顧予曰。今日之遊樂矣。曷不賦之。予才慚鸚鵡。筆拙雕蟲。興之所迫。欲遜靡從。遂援筆而賦曰。惟吾淨友。實處汙泥。亭亭出塵。不蔓不溜。仙遊作真人之坐。孤芳製君子之衣。茂叔愛之。固氣類之相召。六郎似之。實薰蕕之不齊。爾乃廣沼繁開。亭臺四透。翠蓋飄搖。朱花窈窕。豈湘妃之出遊兮。從神女之紛紜。抑秦宮之曉妝兮。盡綠雲之繚繞。容華半吐。類碧玉之芳年。風韻猶存。似徐孺之既老。此則荷之大凡也。若乃佳人雪藕。公子調冰。綠搖歌扇。紅襯舞裙。高閣層臺。引香風之四襲。名花傾國。矜解語之同心。又或歌聲四起。競採江濱。波間妝影。堤上郎心。恨紫騮之嘶去。羨有女之如雲。此則觀之麗以淫。而非我與二三子之觀也。乘彼小艇。優哉游哉。盪槳徐入。浮萍亂開。白鷗驚起。偃蓋迎來。人面當花。傾圓珠而袂濕。繁葩迷徑。窮淺渚而舟迴。揮毫抽思。泛酒揚杯。此吾與二三子之觀。而無羨乎世俗之觀也。第卷舒有時。興衰頓易。蓮房露冷。悲敗葉之當秋。紅袖半垂。嘆殘陽之向夕。曾榮華之幾時。忽過隙而何及。今茲之遊。於時爲夏。於日爲朝。正羣芳之爛熳。恣吾輩之逍遙。於是縱觀樂甚。相與扣舷而歌之。歌曰。採蓮兮中州。舟不行兮夷猶。紉蘭以爲佩兮。知傍君兮無尤。已而朝露欲晞。東方日

出。諒後會之非遙。留餘歡于未畢。舍舟兮歸來。長揖兮謝客。

爰山夫與周侍御燦(注)病目詩畫俱廢。

汝南諫草滿西臺。故國浮雲江上哀。畫裏青山嘗獨往。愁中詩卷不須開。寒河帆影秋風盡。深夜濤聲白雁來。塵土十年空落魄。祇因望岫刺船迴。

顧樵水懷周光甫燦

草痕添綠柳條柔。幾日東風到陌頭。處士詩篇存甲子。仙源物候記春秋。讀書月照梅花屋。放鶴雲開杜若洲。十載紅塵衣不染。冰霜珍重舊羔裘。

吳宗漢花朝集周侍郎御閣昭南園

初名振蘭。號九晚。字南村。兄弟七人。互爲師友唱和。結驚隱詩社。居殿墓。五月五日祀屈原。九月九日祀陶潛。

茂叔庭前春草霏。幽期我亦戀寒暉。人倫李郭今仍在。蒼舊東南半已非。晴倚石闌欹白袷。畫簾簾角待烏衣。山翁何事安真率。多少紅塵未得歸。

吳炎丹青引贈周侍御閣昭

初名錫珩。號媿庵。康靖先生吳肇光長子繩孫子。爲莊史獄連坐死。

世人不識丹青道。肉眼矇矓昧眞寶。古來畫神不畫形。化工無痕始稱好。其中精理得者稀。前有尙書後繡衣。麒麟生面開未得。奚囊空貯江山歸。滄浪寂寞朝且暮。埋輪直少盟鷗鷺。千觴百咏老不知。更遣深情托毫素。畫水作溟渤。畫山成崑崙。蛟螭雷雨忽飛動。洪濤絕壁爭崩奔。有時點染小山色。寸渚霏微翠

嘗滴。溪深林遠落花靜。釣舟自逐孤雲入。山水大小不足云。得失還須靜者分。屏端已識輞川句。卷後必有河東文。手能揮灑口能說。定使良工歎奇絕。乾坤并作壺中圖。何處仙人尙生活。衡山子。石田生。君家尙書俱有聲。寥寥此傳至今絕。先生并集三家成。秦川岱嶺悉破碎。剩水殘山空點綴。索取先生一幅絹。想見千秋眞帶礪。

吳欽明南園雜咏爲侍御周闇昭賦

聽松軒

謾謾枕簟涼。一室松陰裏。松高自有聲。未必因風起。

梅坡

雪後春來早。花香獨有梅。却愁明月夜。吹笛玉人來。

撫辰南園雜咏爲伯父闇昭先生賦

松峽

蟠松夾層厓。倒影碧潭水。似有雙龍潛。時見風雲起。

木蘭亭

木蘭不作舟。花開映簾幙。應知瑤圃林。不耐風波惡。

張世煒題本朝松陵詩人周閻昭詩後

身世沉冥付海鷗。繡衣堂畔月輪秋。閑來點染煙雲筆。長挂床頭作臥遊。

附錄二

吳江縣志

周燦字光甫。用元孫。崇禎元年進士。知宣化會稽二縣。咸有治績。十六年擢浙江道御史。巡按江西。入境屬吏皆遣役具揭迎。獨某令兼以厚幣。燦怒。留役不遣。吏皇遽乞歸。乃召諭之。令聞解組去。時張獻忠連陷袁吉二郡。省城大震。燦登陴防禦。復調兵討賊。二郡得旋復。明年福王立。南京宗室朱統鑣誣劾江西在籍詞臣楊廷麟。召健兒謀不軌。燦具疏言。廷麟聞燕京失守。徒跣號泣。願破家謀恢復。事雖中沮。而其奮不顧身。以赴國難。乃其實心。有何他念。得此異謗。王不問。又奏復艾南英舉人。請錄用舊臣。大學士傅冠。兵部尚書熊明遇等。明年南京亡。遂歸不起。惟與同邑高蹈者結詩社相唱和。卒以追悼國事。慟哭喪明。所著有西巡政略。澤畔吟。

集評

陳皇士云。光甫詩彬彬有序。大雅之音。

徐虹亭云。讀侍御韓蘄王碑。詩詞不多。而激昂流轉。斯人豈比張魏公一語。足慰蘄王於泉下。

周笠川云。光甫巡按江西。入境屬吏皆遣役具揭。獨某令兼厚幣。公怒。留役不遣。役皇遽乞歸。乃召諭之。令聞之解組去。其丰峻如此。公能詩。兼好畫。國變後堅臥不起。以慟哭失明。武塘爰丹生。贈公詩句云。畫裏青山長獨往。愁中詩卷不須開。蓋實錄也。

王鵬云。闈昭侍御。學問政績。詳載志乘。無復贅述。其自江西歸後。與同邑高蹈能文之士。結詩社於花園庵中。相倡和。並以繪事自娛。筆意疏遠。得白石翁意。

潘力田丹青引贈闈昭公云。明興以來論繪事。奇逸無如石田子。筆疎墨勁若有神。一花一石安足比。同時入室恭肅公。天機脫略悟真理。屏障一掃出岷峨。勢捲吳淞半江水。當時片墨留人間。畫師一見心欲死。予不識公猶識公之孫。文采功名今並存。聞已牽絲剡溪道。况乃掛冠柴桑村。山水有命得真師。不爾家學空探原。旁參前代數十家。下筆但覺縱橫奔。歸來十年五溪臥。經綸萬事皆塵碗。重寫河山元氣人。纔添花柳春風過。能事不與俗人知。懷奇每仗詩篇佐。吾友顧生亦善畫。每見咨嗟神色挫。豈無筆力入柔媚。獨將奇骨酬坎坷。噫嘻先生龍在野。物望豈出先賢下。絹素怡神良有以。遠追茂苑恣瀟灑。臥遊不用買青山。勝事何妨畫白社。沈耶周耶合一身。行藏有道豈相假。君不見凌煙他日貌真形。卽是今日貌人者。

後序


先大父諱燦。字光甫。號闇昭。爲恭肅公五世孫。向自爛溪析居謝天港。家貧。少攻苦。年十七補博士弟子員。試輒冠軍。藉館穀自給。二十有八歲登崇禎庚午賢書。辛未成進士。授廣西南寧府宣化縣令。多善政。癸酉分房簡拔。皆粵之翹楚。乙亥丁內艱。服闋補任會稽。值境內飢。穀踊貴。公爲賑濟。全活無算。有救荒策。越人遵以爲法。壬午奏最考選御史。巡按直隸。提督河道。興除利弊。漕艘赴京無後時。癸未奉命巡方江右。時流氛壓境。躬率士卒。巡歷晝夜。毋敢怠。危疆賴以安。有西巡政略行世。秩滿復命。告歸故里。以國變。絕意出山。杜門謝客。感慨時事。旋病。目至失明。所著詩文。宗韓柳。學少陵。山水師北苑。諸子百家。皆批點校讎。日唯二三世外之友。相往來酬和。澤畔吟其最著者。乃以兵火故。稿多遺失。此特其一。二云爾。孫師灝百拜識。

侍御公澤畔吟。舊時藏本。被虜取去。咸豐建元四月。訪濬菴姪于童初室。案頭見在劉公鈔本。忻然假歸。錄一副本。藏于書篋。吉光片羽。子孫寶諸。七世孫清熙錄畢敬識。

跋

先開昭公立朝大節。具詳吳江縣志。而生平藝事。又備見鄉先賢徐虹亭周笠川及山夫諸先生所稱述。此書爲師灝公所輯錄。嚴鴻逵先生爲之序。歎爲義熙遺音。瓣香三閩。使人讀之。足以興起。顧以語多忌諱。懼觸文網。藏諸祕篋。不以示人。如鄭所南之井中心史。沉埋銅閉。亦既三百年矣。洎歲丁丑。忽遭變故。家藏舊籍。半付劫灰。而此卷獨墨迹如新。長留天地。嗚呼。謂非先公之靈爽式憑。陰爲呵護歟。茲承滄秋館長列入吳中文獻叢書。廣爲刊佈。羅網遺文。先澤因賴以不朽。表章潛德。小子實感且勿諼。爰誌數言。敬以跋後云。

中華民國二十九年八月中澣。七世從孫麟書謹識。

A large, stylized handwritten signature in black ink, possibly reading '麟書', is written over the bottom of the page. To its right, the date '9/2/59' is written in a similar style.

民國三十年五月

江蘇省立蘇州圖書館校印

澤畔吟 非賣品

上海圖書館藏書



A541 212 0002 5519B

93/55/